

四庫全書

集部

欽定四庫全書

平齋集卷十九

宋 洪夔 撰

外制

宮觀葉莫除權發遣贛州提舉南安南雄汀州

兵甲制

勅具官某章真與閩越錯壤其俗易搖而難服奉吾詔
令以鎮綏之其惟良二千石乎爾和平而有制莊靜而
有立武岡戎伍之變洞察情偽設方略不數旬克渠授

首一邦底寧帥閫上功既懋爾賞繩於文吏吾帥臣又為爾明白之起分二水之符坐總三州之甲必恩意孚而善良吐氣威信著而悍獷革心治化蒸蒸日上如漢良吏是為不負所舉可

陳良驥轉承議郎制

勅具官某維揚翦寇之賞大閫弟功無微不逮爾庀役瓜州賫伐援比以自請亦陞一列責實方嚴思稱所蒙可

王丙特改承務郎制

勅具官某巴蓬山高林深姦民淵數嘯呼剽劫實煩有
徒爾奮身書生急義鄉井招懷其脅從禽僇其不率一
方安堵諸閫上功超授京秩宦塗方開亦克用勤可

參知政事兼同知樞密院事喬行簡除知樞密
院事同提舉編修經武要略加食邑實封制

勅朕撫車攻復古之運慕烝民任賢之功我儀圖之則
山甫柔嘉侯誰在矣則張仲孝友廼矐股肱之重夙咨

齒德之尊講內治以既嚴籌中興而抑勳進握本兵之
寄俾殫謀國之長渙我明綸諭於列序具官其直大而
不倚深冗而有謀脩然其癯精神溢於萬物之表皓然
其老志氣塞乎兩儀之間予養晦則密勿以效忱予更
化則從容而贊決凡君子小人之進退暨中國外夷之
盛衰備輸啟沃之忠居賴弼諧之助惟關洛有鼎來之
幾會而江淮有前進之規模必元老壯猷乃可以出萬
全必真儒無敵乃可以大一統就煩舊德坐筦洪樞總

提經武之編益懋運籌之略申陪井賦併實圭奮噫詢
黃髮則罔愆朕方謹乞乞番番之戒有常德以立武爾
毋忘繇繇翼翼之圖涉歷深則無躁謀思慮精則無遺
策共恢大業茂對闕休可

資政殿大學士新知建康府曾從龍除參知政
事同提舉編修勅令加食邑實封制

勅慶歷之開太平范仲淹為叅預元祐之新大法呂公
著為疑丞朕遵晦十年厲精一旦趣召先朝之彥俾還

近輔之聯誕敷絲綸敷告簪紱具官某學根乎正大氣
抱乎純明其重足以挫衆紛屹然鼎呂其靜足以燭羣
動瞭若著龜蚤服在於大僚耻苟同於汙俗不合則去
有待而行鶴鳴九臯之聞聲而樂只鳳翔千仞迄覽德
以來思予興相見何晚之嗟爾動可為忠言之喜舉昔
大對勸今力行嘿有契於此心期共由於斯道更化則可
善治宜增重於本朝折衝何必臨邊奚尚勞於外服爰
輟居留之計聿嚴共政之圖蒞勅局以提綱拓爰田而

行賦併昭異數式將英猷噫六典建於周家莫光乎設
忝而置輔庶績凝於虞室尤在乎同寅而協恭勉殫訃
謨之忠共濟垂拱之治可

左諫議大夫鄭性之除端明殿學士簽書樞密
院事同提舉編修經武要略加食邑食實封
制

朕迪簡在廷儀圖共政繇諫長而選蓋僅聞於二紀之
間自掄魁而升况並見於一日之頃繫非常之盛舉必

不世之奇材翊我事樞揚於制縉具官其身端而行治
心廣而體胖鴻漸可用為儀望風高於華著鷄鳴不改
其度志晚適於槃阿維予初潛慕世賢詰未親魏徵之
論已稔蕭生之名迨躬攬於萬幾首旁招於衆正擢從
郡最列在從途朝入對於治朝暮進登於騎省規君德
則中庸大學條國事則天保采薇方累疏之前陳已一
言之嘿悟經躋宥府密筴具籌帷由求之切而得之難故
知之深而用之速總武經之大筆陟書殿之穹班爵肇

啟於徹侯封更陪於多邑以寄股肱之重以示精神之
強噫虞舜之治有五人朕方篤任賢之意宣王之德洽
四國爾盍思復古之圖叶濟廟謨丕昭儒效可

何處久除直寶謨閣知鎮江府制

勅具官某南徐襟江枕海而控淮地望重矣制勝孔嚴
擇守加遴爾材猷宏碩志氣激壯為御史諫官嘗陳內
外修攘之略具有本末朕甚偉之冠冕蓬山未暢設施
祖逖擊楫渡江之地以奎直往為朕圖厥功應接於外

屏蔽於內威行愛孚而天險之勢以強京師併蒙福也
可

何琮除直徽猷閣福建路轉運副使制

勅具官某七閩樂郊也間者鷓鴣義姦宄多抵冒於法非
憔悴苑結莫之省乎爾風槩凝遠性行修潔世道滌濁
能不磷淄朕器之奏對間久矣歛武華要寓直凝邃夙
駕暑征徃將使指豈直為飛輓計以鐵冠觸邪之餘威
察一道臧否貪廉丙剌舉之使姦吏澄而民氣舒斯稱

朕臨遣之意可

董洪父自修王公瑾父羽方岳父欽祖趙子森
父復先陳子椿父千期朱炎父師友孫鏞父
价明堂恩封官制

勅具官某總章大饗熙事涓成斂福錫民同躋仁壽爾
耄期康彊有子仕版京秩疏封式昭善慶可

太中大夫曹叔遠特轉通奉大夫依前煥章閣
待制致仕制

勅訪正元之遺事尚想告猶追長慶之高風遽聞請老
莫回雅志用錫徽章具官某襟度曠夷風規凝粹羊腸
峻阪早備罄於忠勤豹尾屬車晚寢隆於恩遇勞禁途
而諗疾佚真館以言歸賜杖竊遲掛冠何急疊進高華
之秩仍通嚴邃之班祇服寵榮益綏壽嘏可

正議大夫程秘磨勘轉正奉大夫

勅等六曹而上課嚴三歲之遷超四品而陞秩重八年
之轉雖循彛典實著恩章具官某粹學淵深英規山立

謀猷獻納備殫日月之忠典冊鋪張叶應風雲之會繇
殊庭之引興每魏闕之存心積閱既深陟明可後飛鴻
自適初何計於穹階鳴鶴相求肯尚遺於宿德可

閻丘梓林炎趙崇媿趙崇森除大理評事

勅具官某等典獄惟平之難漢吏用法巧文浸深於是
置廷尉平四人務平之爾皆練習律令而文無害故並
命以司庶獄之平明啓刑書胥占咸庶中正則平矣欽
哉可

虞衡除大理寺正制

勅具官某王制獄辭之成史告於正正聽之正所以正庶獄之不正也爾簡澹而詳敏褰帷嶺嶠之東以風力著庸命爾正於李吏有上下其手以舞吾法爾悉為朕糾之庶幾廷中稱平而天下無冤民可

權知信州史彌志除將作監制

勅具官某上饒間於江浙頃悍卒軼紀律以駭吾民翦其萌可緩乎爾優於應變勇於討惡尺二渠於市而羣

姦之魄褫千里底定朕甚材之召丞二匠監用旌爾能繕
修務簡益培雅望可

趙與懽起復直寶謨閣淮西提刑制

勅具官某兵刑一也西淮方整軍經武陳時臬事宜加
謹爾公族之雋材優而氣盛嘗守輔邦蔚有能譽繁
弱可久橐乎起之纒棘進之奎直徃司臬於西能使在
泮獻囚與在泮獻馘同功則移孝為忠之道得矣可

大理寺丞桂萬榮除考功員外郎制

勅具官某馮唐白首顏駟龐眉尚書郎以老於職為重
爾行已純固蒞事精恪丞於北寺不詭不撓蓋涉深而
識定者也考功課吏之法公則一私則萬殊勉為我權
衡之抑揚惟允俟有褒進可

權兵部尚書趙至道除寶謨閣直學士知鎮江
府制

勅法從莫如文昌八座之尊介藩莫如扶風三輔之重
必卷舒之有裕斯出入之俱榮具官某早以孝稱晚繇

庶進歷耳目之寄每侃侃以自將升喉舌之官尤循循而維謹久厭禁嚴之直欲尋閑退之盟莫挽而留宜華其去赤刀琬琰峻秘職於西清阜蓋朱幡輦名城於北固亟上中興之最慰予耆艾之思可

太常寺丞兼權右司曾天麟除將作少監

勅具官某永惟技巧工匠之鮮及不如宮室苑囿之無增故膳監不以飭工而以程才爾疏通而艾寬靜而粟材出鄧林信良矣容臺自闔趣陞於少匠厚其儲以致

用也爾知器用利則用力少而就效衆斯識朕心可

王淪轉承議郎制

勅具官某朕觀新店民之語知和糴之厲民尚矣爾守
滌日糴辦而民不擾數逾三萬應我賞格增秩旌賢尚
鞭其後可

歸順人沙兀惹特補修武郎添差蔡州兵鈐兼
權蔡州事詔

勅具官某襄漢奮伐淮蔡底平莫府以戎捷來上謂爾

能知逆順之分赤心歸誼願效忠力蔡人即吾人也爰
畀右階就命爾守復民業以趨耕作士氣以待戰保障
鞏固斯稱委寄可

房應發轉文林郎制

勅具官某六駮復土五使置官凡備驅馳悉霑賞賚爾
祇吏役例進一階茂對恩榮尚思策厲可

劉顯以父評戰歿補承信郎制

勅具官某蜀關禦寇虜將死勇爾父從之鏖戰繼歿羽

林孤兒漢恩特厚錄爾一官用勸徇國可

石天瑞白華補秉義郎制

勅具官某等方城濯征垂瓠震潰執訊獲醜餘燼為空
爾能自歸貸而官使尚圖忠効用答生全可

李駿起復直龍圖閣四川都大茶馬制

勅具官某秦蜀權牧之政分合凡幾然非其人分任而
不足得其人合治而有餘爾沉毅足以經遠果達足以
治劇所居底績晚譽更偉坤維事力日置茗法壞而後

馬政壞頃嘗分任未見其益也茲庸合以命爾且寓直
淵圖以重其行毋俟祥琴慷慨叱馭能使廉信決於園
戶行於蕃落則摘山富而效牽煩矣可

工部郎中鄭寅除尚左郎官制

勅具官某良以止為體能時止則止然後能時行則行
爾簡粹而通亮為郡嘗以治理效聞顧時俗之流又孰
能無變化懼荃蕙之為茅也而恬然歸潔坐玩歲華待
化機之轉移偕衆正而彙集其將有行乎郎選甚高毋

憚於劇朕方思所以進爾者可

王邁轉朝請郎制

勅具官某權務萬貨萃焉而摘山煮海之利居多羨入
必賞厥有著令爾材優於從政嘗司出納歲有羨利其
知理財正辭之義乎一官懋賞益圖爾庸可

將作少監趙與芮除大理少卿制

勅具官某孟侯朕其弟必卷卷以陳時臬事丕蔽要囚
為誥豈非刑者君子所盡心焉友之篤則誨之切乎爾

氣質金玉步趨繩矩卓有大雅不羣之風朕猶欲其政
事之篤也既試之大匠又試之少大理民命至重國脉
所關欽哉惜哉其寧惟永爾亦與有令聞可

鄧雲轉武節郎制

勅具官某山東逆儔負固淮楚大震貔貅之氣一空狐
兔之羣制閫第功爾嘗鏖戰進官四等獲戎湖右其日
夕淬厲以稱信賞可

王旻

勅具官某峻升武級用獎驍雄仍頒戎律之嚴坐鎮邊
城之重祇承異渥勉策竒勲可餘同上

直寶謨閣宮觀劉宰除太常寺丞制

勅具官某聖人與曾點悅漆雕開蓋不汲汲於用乃所
以致用也爾德於天者厚求於人者淺見幾遠引樂道
而著書與行乎國政之久者相為終始世方瀾倒獨落
落乎其有風飈朕甚嘉之拔之槃澗丞我奉常幡然一
來尚不負國人之望可

考功員外郎桂萬榮除尚右郎官制

勅具官某比歲倖門開而吏道雜武級猥濫尤甚綜覈
方嚴銓管宜允爾為考功郎氣嚴詞厲莫敢欺推是以
修審官西院之法鑒揭而妍醜分衡設而輕重判劇曹
其澄乎來幾何日三錫厥命用惟其才毋謂序進可

平齋集卷十九

欽定四庫全書

平齋集卷二十

宋 洪咨夔 撰

外制

兩淮制置使兼沿江制置副使趙范除江淮制

置大使制

勅全江淮濟中興莫大乎要衝之勢築壇場拜大將莫
嚴乎專閫之權迺曠時髦密承廟筭內養威而植屏外
觀變以投機丕建使名特加命紱具官某挺資果毅抗

志忠勤材闕而用周力振西平之業氣壯而識老遠追
鄧禹之風自討賊之策勲即平戎之定計入儀法從出
撫成師朕惟九節度以無統率而危唐四將軍以有領
屬而強漢必中權之獨總斯外治之咸張車攻復會東
都首經營於江許闕宮遂荒徐宅先疆理於淮夷茲大
恢表裏之規摹宜畫稟精明之號令翼翼文昌之座堂
堂太乙之旗壯本根於荆揚震聲采於汴洛詩書之帥
以尊主為德仁義之將以安民為功行三軍則務於好

謀掌六師則貴乎同力觀宣勞之浸久信任重之優為
江左自有夷吾朕方倚深長之畧河南盡為晉土爾盡
堅綏定之圖

權工部侍郎留元英除集英殿修撰知江州制
勅翠綏鳴玉入聯法從之榮阜蓋飛旗出殿名藩之重
不輕厥選宜責其行具官某篤實無華寬平有則物情
方靡初何意於鷹鷂世道既回仍可儀於鸚鷺政藉居
中之益忽騰補外之章勉徇懇祈俾圖共理升班論議

留夙望於甘泉奉最藩宣寄壯懷於溇浦予曲盡待臣
之禮爾益殫報上之忠

華奩除國子博士應繇除太學博士兼在文府

教授汪之道除國子錄制

勅具官某道存乎人心蘊之為德行行之為事業文辭
陋矣朕故謹擇知道者為學校師爾奩直簡而廉爾繇
融明而靜爾之道英拔而粹俱有得乎正大之旨庸命
奩為博士以學曹子繇為博士以學士仍典藩房之教

之道為錄以糾曹監之不如規者師道立而皆知以求
仁明善為急化成天下獨不在茲可

前右正言何萬齡特轉朝奉大夫直寶謨閣致

仕制

勅具官某臺諫以觸邪指佞為職自仗馬相戒而舍豺
狼問狐狸有年矣爾以駿發之才邁往之氣列在騎省
能於波流風靡之中奮擊大吏疾於迅霆非不畏強禦
者乎銜卹以沒歲月奔馳崇階遽職示不汝忘可

著作郎兼權司封郎官蔣重珍除起居舍人兼

崇政殿說書制

勅具官某迪惟先朝策多士得掄魁之彥敷遺後人休
朕既簡在大僚又簡厥修如爾重珍者以柱史從華光
之游矯矯乎鳳凰之集阿閣黃鵠之下太液也榮貴素
定盛名難居詔美責難益究爾韞使碩大光明不愧天
聖嘉祐之盛顧不偉與可

黃壯猷除金部郎官制

勅具官某朕方經理京洛財計裕於內則事力充於外
金幣委輸鉤考其數以周知登耗而頒節制司珍職也
爾器局明整才華暢茂司度左浙能斟酌取予歛散之
宜以又我民趣踐郎省參掌國用曹雖劇及游盤錯矣
抑以是詳觀爾之能可

司農寺簿趙鎬夫除司農寺丞兼提領安邊所
制

勅具官某景壽昌承天農闕內漕穀國使之常平置倉

民使之北邊亦藉以給丞不當如是耶爾鎬夫機園而不窮氣銳而有立逾月再轉就丞九扈且坐絕邊計材選也孰利當興孰害當除毋使壽昌專美於漢則職之稱可

軍器監簿陳振孫除諸王宮大小學教授

勅具官某我仁宗詔諸宮院教授非止講習經旨須選履行端慤蓋欲其以身教也爾靜而不競簡而不華可謂端慤矣振振麟定以爾為之師觀矩度於步武之間

挹芳潤於言論之頃而成童既冠莫非大雅麗澤講習之功將有考於此可

方大琮除司農寺簿樓朽除軍器監簿制

勅具官某寺監有簿職鈎稽違失簡矣國以養材士以養望爾大琮粹然其瑜而靜俾簿於農寺爾杓疑然其度而立俾簿於戎監鴻之漸而鷺之振也觀其所養朕不敢忽爾益觀其自養可

知南安軍彭鉉職事修舉轉一官制

勅具官某漢二千石有治理效輒璽書勉厲增其秩故
良吏為盛朕甚慕之爾果於事功達於識慮而敏於材
江右南接嶺嶠俗悍而闕壘假守能不以繭絲易
保障田里相安姦賊屏跡其漢吏之良乎一秩示勸益
進於理以對顯擢可

施梏差知雄州制

勅具官某融在廣右為望郡銅虎符璽不輕畀爾以淳
熙執政之胄克修令猷履平而植固三為別乘抱璞不

售亦老於世故矣是以起家母鄙遠其民而厚拊之廉
善達於聽聞斯稱惟良之選可

曹叔遠贈光祿大夫制

勅老之將至甫抗志於垂車生也有涯遽遺言於易箆
推我盡傷之意形於贈襚之章具官某薰然澤物之稱
蔚乎成已之學中年去國流落而氣不衰晚節還朝虺
隤而志已倦進陟論思之選退尋蕭散之盟方惜日以
自休胡御風而不反出處本末具知存闕之忠始終哀

榮茂享書棺之寵可

李衍直寶文閣致仕制

勅具官某河東守以一人之毀而去雲中守以文吏之
繩而罰今昔之通恨爾直方自信無所撓折宅牧淮右
竟以賈憎朕夷考其平生公於狗國廉於居官睽弧之
疑可亡也齒髮未衰遺榮何亟進直寶奎尚其吐氣可

吳淵除右文殿修撰知鎮江府制

勅具官某物不受變則材不成人不涉難則智不明此

風雨霜露所以為天道至教爾以昂霄聳壑之秀質出於鄧林夫豈常材也哉而匠石必取於斲華就寶之後京口為江淮襟喉升班論議起家出鎮識老噐定而政平軍民之福也暇日登北固而長望慷慨擊節聞風作興斯稱予蓄材待事之意可

蔣重珍除集英殿修撰知安吉州制

勅具官某董仲舒宜在漢庭而出相教令國中所居輒治志在及物無中外之間爾以奧學闕識奉天人之對

嘗褻然為舉首不輕於售挽莫能致迨攬大政幡然肯
來敷經旃厦吮墨螭首朕方傾意卿之非仲舒不遇比
也卧疾念歸姑以論譔殿輔藩勿藥且名矣可

姚瑤除直秘閣權知建寧府制

勅具官某富沙軍情屢搖項為甚官治民廬半委烈燼
朕念之怛然故選熟知德意者為守寓直中秘以榮其
行爾名在文學之科而議論鏘發志氣英邁丞于麟臺
即於憲部與聞廟筭於宥府聲聞日起詎宜輕去一方

病矣勉為朕往廉平以字民簡靜以馭軍百廢具舉而
聲色不動以表列城可

何炳除集英殿修撰知江州制

勅長江上下護風寒非一處潯陽西挹武昌東引京口
自晉以來為重鎮故輟從臣臨之具官某以撥煩之才
致遠之識嘗建臺閣于上流厥績用茂晚登從塗齒宿
而氣不衰升華論撰往控天險酌保鄣繭絲之計嚴網
繆牖戶之圖江波不驚廬阜屹峙尚可登庾亮之樓而

銷憂也可

國子監書庫兼皇后宅教授徐雄除國子錄制
勅具官某虞周有曾子國子之教漢有四姓小侯之學
朕參用之以作人爾講習克勤圭角不露方授經陰馬
之家遂分錄成均之政師道行焉茂哉思其所以為人
師可

陳大樸平黎蠻賞轉儒林郎制

勅具官某黎蠻干犯海邦繹騷爾密贊守臣設謀致討

論功宜賞爰進一階漢水之陽益勤警邏可

張綽平蠻督餉賞轉儒林郎制

勅具官某黎蠻干紀海邦繹騷維時守臣亟致討定爾
服官黃綬督餉良勞示勸一階益勤警邏可

趙善瀚知岳州制

勅具官某岳陽處粵蜀荆楚之會吳晉皆為重鎮以魯
肅陶侃為之守爾氣盛於權竒材優於盤錯傑然公族
之穎繁弱橐藏人所共惜起馮熊軾揖肅侃於千古之

上可無薄洞庭而羞君山也維彼澤國民生孔艱悉力拊循無失休譽可

黃朴改差知泉州制

勅具官某奉親而守便郡縉紳之至榮爾學問昭融議論激壯以掄魁雅望昌文聲於朝而料戎情商國勢類出人意表識者以方面材期之甫懷吳興之綬隨綰溫陵之組去家壓境能幾何舍板輿親御如行戶庭父老相與榮艷於道周且喜色相告曰仁孝同源孝於親必

仁於民凋瘵其甦乎可

涂顯行知崇慶府制

勅具官某蜀在萬里外朕於人物之賢否難踰度而耳目惟制閩之寄爾之公廉律已豈弟愛民彥呐為朕言之觀遠臣以其所主唐安一麾不汝吝也政平訟理圖稱厥舉勿以去朝廷為邈可

厲模楮網賞轉朝請大夫制

勅具官某幣行於東南而取楮於蜀精實緻密偽難以

亂真也爾抱才敏銳將漕井絡歲發楮綱適應賞今其
升一級庸勸奉公可

權工部侍郎徐僑除集英殿修撰提舉佑神觀

兼侍讀制

勅勞侍從之事願去承明考仁聖之風勉留廣廈雖優
老之盛典實從儒之盛心具官某志操孤高問學淳古
詠歸沂水之上世果何求作興北海之濱時然後出有
嘉耆艾置在清華守益固而眷益隆進愈峻而辭愈力

茲領祠於闕下仍勸讀於禁中以體貌大臣之舊規為
尊寵高年之特禮更陞論議不替纂修行葺之養老乞
言亦孔厚矣大學之致知格物尚茂明之可

黃堦知肇慶府制

勅具官某朕惟民生之不易吏治之不良雖斗壘未嘗
輕畀矧名藩乎爾承元祐故家之傳材優而氣壯自著
勞於試邑即振譽於登畿僅爾小休倏焉起復為遐嶠
之民擇守也潰旅未殄地迫高要徃疾其驅亟圖案堵

可

丁睦除直寶謨閣淮東路轉運判官制

勅具官某王良造父之御鳴和鸞逐水曲無不中節人
與馬相習也爾氣明而敏材通而偉屏翰澄清之最荐
著於淮左物情地利習之久矣茲還寶奎之直俾膺飛
輓之寄咨誨貴廣積貯貴豐徃究乃心用圖厥績以寬
我東顧可

平齋集卷二十

欽定四庫全書

平齋集卷二十一

宋 洪咨夔 撰

外制

魏了翁除權禮部尚書兼直學士院兼侍讀制
勅秩宗之典三禮虞凝垂拱之功春官之掌九儀周格
盈成之治繫制作之自古必推行之在人進我鴻儒膺
茲妙選具官某氣以志為帥學以經為宗賈誼六太息
之書洞達國體魏徵十不終之䟽仰當帝心梧桐方挺

於朝陽蒹葭已颯於白露遂處以順樂忘其憂務著書
而立言期精義以致用綠竹猗猗而瞻彼澳每興磨切
之思白駒皎皎而食我苗徒起繫維之歎適中朝之更
始俾外服之過歸賸百王之典寢微而一代之防多闕
匪究定民之本曷為經世之方漢僅草儀猶折武夫之
氣魯惟秉禮卒回強國之謀爾孰講乎后蒼之九篇深
稽乎姬公之六典未入趨於宣室趣攝長於容臺仍摛
盤詰之文更勸索丘之讀登崇伊始簡注良深吏士之

見官儀正賴濟時之畧公卿之明王制毋忘致主之規

叅知政事曾從龍除知樞密院事加食邑實封

仍兼叅知政事制

勅聖賢相維而致昇平莫重弼諧之寄文武兼資而有
智略尤嚴宥密之圖迺瞻譽髦洵參大政進究五兵之
重用培九鼎之尊倚成匪輕作命惟允具官某學該乎
今古識貫乎天人長江大河不足以喻其量之深太山
喬嶽不足以言其器之重夙擅擒魁之望嘗陪近輔之

聯仲舒見疾孫弘不少安於朝廷之上李泌出避元氏
寧退處乎畎畝之間既屢最于介藩爰趣還於政路屬
逢更化備罄告猶直方大之兼全深得鎮浮之體知仁
勇之並用洞明應變之幾顧邊鎖之孔艱期廟謨之洪
濟宣帝樞機周密固先二相之資憲宗紀律設張尤切
衆賢之助肆疇庸於間社俾進序於本兵總提星紐之
權仍贊台衡之務邑奮申衍邦典增崇以成道德之疆
以全帝王之勝噫天保治內所以收采薇之功丞民任

賢所以定車攻之業維真儒之無敵知中國之有人務
遠乃猷用底於乂可

簽書樞密院事鄭性之除同知樞密事加食邑

四百戶制

勅帝舜之格三苗有伯益以贊禹宣王之定四國有吉
甫以誦申賧宥密之孔嚴賴寅恭之協濟肆頒命絳參
典事樞具官某資早悟而夙成學旁貫而曲暢函鐘太
簇為角始終繳繹之和玉瓚黃流在中表裏清明之粹

久矣冥鴻之去時哉儀鳳之來不累日而長諫坡未再
月而登政路以非常之際會為有大之規摹難於定不
難於回熟知國勢可以戰斯可以守洞識戎情爰進貳
於本兵仍申陪於賜邑維予制勝咨爾陳謨府兵列於
關中孰是相維之制屬國置於塞下曷為叵測之防隱
憂既深區畫可後坐弭控弦之警密輸借箸之籌噫文
武之憲萬邦政有賴中興之佐明良之圖庶事盡共康
丕應之功惟爾之能俾予以治可

同簽書樞密院事陳卓除簽書加食邑四百戶

制

勅民獻教寧武功求濟於艱大之日王師遵養時晦用
介於純熙之餘睠國勢之重輕視人謀之臧否進賢宥
府揚號明庭具官某柳下惠之聖和樂正子之好善謙
謙自牧夙全君子之風蹇蹇匪躬克慕王臣之操紛炎
門之競騖獨夷軌之徐行一泯伎求兩無淄磷去知有
命靡矜器能政理之長來亦何心益稔議論文章之望

迨親覽於威柄爰趣登於政塗勤樸斲於梓材力贊厲
精之治綢牖戶於桑土常懷先事之憂備罄壯猷深
邃簡就陟樞庭之序仍循書殿之班爵進公主秩陪邑
采俾密裨於勝筭用坐折於遐衝噫明主可為忠言朕
方合介冑縉紳之議上策莫如自治爾盍思車馬器械
之圖必同寅協恭而和衷斯禁暴定功而保大式孚民
聽庸對王休可

余玠起復宣教郎襄陽府通判兼西京制置司

機宜文字制

勅具官某奪情非令典也惟從戎則許其墨爾以明敏
練達受知於制閫秋防孔邇辟置自助起之望室貳政
要藩且參幕府之畫不以家事辭王事其禮之變乎移
孝為忠勉圖協濟可

李勉平黎賞轉朝奉郎制

勅具官某廣右平黎上功爾以彊敏宣勞於莫府進二
秩以獎之甫通閩籍遂階員外異渥也試邑於虔益厲

勿懈可

軍器少監徐清叟除將作監依舊兼司封郎官

崇政殿說書制

勅具官某朝廷之用賢非一途信其賢即用之惟恐不
亟故必躡正郎梯監少而升爾家傳正大之學躬厲直
方之操金華開說援古以証今疊疊不倦朕甚嘉之攝
主爵貳戎監而進大匠華軌直矣朴素化行繕修務簡
涵泳竹素綽乎餘暇輪人有釋椎鑿議上之讀書者試

詳訪之以告庶乎他山之石可以攻玉也可

大宗正丞蔣峴除軍器少監仍兼權侍左郎官

制

勅具官某武監戎部之附庸官間無事少也占位涉筆
無幾牘然向用之材於是乎儲爾學問醇茂義理融暢
恬夷而莊舒卷阿吉士其人歟丞我麟宗攝郎銓省几
案文書填委不動聲色隨手冰泮而九品無遺鑒體用
具矣試材以劇養望以暇鶴膝犀渠姑貳程作朕方圖

所以進爾者可

丘岳除兵部郎官趙與憲除都官郎中兼樞密

院檢詳文字制

勅具官某等國朝最重尚書郎之選懷香而奏明光襍
被而直建禮非郡最不真授爾岳篤茂而暢邁守夷真
以吏畏民懷稱爾與憲䟽明而詳達守嘉禾以政平訟
理著朕厲精政事以來歷課吏治皆其良也表惟良之
吏以勸郡國故俾岳郎于司武與憲自丞大宗郎于司

僕且攝屬於宥府太微積星之次即日為真顧不謂榮乎兵不可黷刑不可濫必寢必措勉贊而長可

樞密院編修官趙汝遂除宗正寺丞仍兼右司

制

勅具官某王丞望華職簡而宰屬為劇授官兼劇以簡欲其才有餘於事也爾早收危級蔚著雅望攝組省闥靡枉於法守而事不辭難沛乎其才也擢由編纂涉筆宗盟仍行紀綱百司之職輕車熟路疇能及之益涵致

遠之器用對方來之渥可

汪之道除太常寺丞制

勅具官某漢制朝議武夫拔劍擊柱之風為之氣奪使
成周禮樂得見於後世情偽之防何如哉故奉常置丞
必通於古誼爾學博而約氣直而清時輟冕舞之傳孰
復蓋久談經官邸薰陶信厚涉筆曲臺宜矣因革損益
訂古而施諸今以美化善俗亦惟無忘夙夜惟寅之義
可

劉克莊除樞密院編修兼權侍右郎官制

勅具官某時政紀者國史之椎輪經武要略則先朝制
勝典刑之囊括其書纂次於樞屬自昔必名儒文士爾
家傳儒藝蚤著文聲韞抱不凡脫餌科級諸老先生多
之簿正屬籍進升刪潤維汗青之稱也與聞廟畫攝事
郎讚精必簡通對我殊擢可

陳一薦護獻俘有勞轉朝奉郎制

勅具官某垂瓠合圍穹廬就燼函首緒檻天網獻功於

藁街修途護役爾實宣勞其升員外之階徃効莫中之畫可

顏信之獻俘有勞轉保義郎制

勅具官某淮蔡函骨獻俘之役爾與有勞其陞一級以酬跋涉可

蔡仲龍除大宗正丞兼權屯田郎官素尚太常博士並兼沂請王府教授制

勅具官某等沂邸於屬為近朕篤內睦擇師而教之久

則遞遷獎其勤爾皆以經明行修立於朝如玉在山煜
然其輝潤楷範麟趾麗澤多益是用進仲龍丞於大宗
且攝省郎進商繼仲龍議禮於曲臺而典教悉惟求舊
懋詩書禮樂之訓陶河間東平之風不特講習留屯蒐
綿叢之欽厥職也可

安恭行除大理寺正制

勅具官某廷尉有正監及平漢制也我朝置正於卿少
之下丞司直之上厥選蓋謹爾材資亮通風矩明整蔚

其梧鷓之秀丞郡以李法簿召未至升之正以聽獄成
甄拔峻矣書曰明啟刑書胥占咸庶中正勉哉圖厥稱
可

魏峻除宗正寺簿楊璟太府簿趙與爽籍田令

制

勅具官某等梗柎杞梓之材生于鄧林其地美也非雨
露之養不成爾峻簡而溫雅而文爾璟茂而通整而練
爾與爽穎而秀韶而明英英世家翹翹天支朕皆欲養

其材以待用故進峻簿正於珽牒瑛繼峻簿外傳與爽繼瑛令帝籍前暉後映其各懋於自獻可

馮去疾除武學博士制

勅具官某善用兵者不學古兵法而圯下一編亦詎容無師慶厯置右庠之意昉此爾以通經博古之學彪炳於文成均諸生咸歛衽其下風而平時慷慨激烈論南北離合之勢兵家勝負之畧皆有據依遷之博士使業韜鈴者又得所矜式新美作成之下安知不有武舉如

子儀出於中乎可

劉宰除將作少監制

勅具官某朕宵旰圖治計効猶邈每嘆君子有材之難
然不敢諉斯世之無其人也爾隱居以求志深造而自
得君子人歎其論天下事目無全牛投及可以中桑林
之節材益偉矣旌詔屢下未肯從吾游何耶超越拘攣
繇丞奉常經貳繕監迎之致敬有禮矣惠然來思毋興
盡而返可

尤燭除知江陵府兼京湖路安撫劉輝叔政績

轉一官依舊知建昌軍制

勅具官某等河東以地望之重歸季布潁川以民情之
安留寇恂悉惟其宜爾燭抱識時應變之長往帥荊州
事權非昔而承上撫下無間言可以為難矣故齒名復
還以壯吾上游控扼之勢爾輝叔厲盡職奉公之志出
守盱江邑里甫集而興利除害無遺功可以為善矣故
選擢復留以尉千里戀慕之情分閭乘壘任有輕重朕

為地望民情而擇官奚有間哉各鞭厥後無棄爾成可

葛洪除資政殿大學士提舉洞霄宮制

勅武公叡聖晚年不忘箴規之心文子廉忠美猶篤事
君之志朕緬懷舊弼久樂燕居年垂九袞之崇望稔三
朝之重峻深邃職昭示隆恩具官某嶧陽特生之桐新
甫後凋之柏致身廊廟雍容麟也之來引興丘園翕忽
鳳兮之去仁樂山而俱寂義飲水以自娛雖黃髮之皤
皤愈丹心之炯炯廻瞻粹古務尊者儒不得謝則賜杖

而安車優游佚老如有問則就室而珍從懇切乞言方將遺掌故而訪伏生乃欲致少傅而從䟽受旄期雖重於趨召矍鑠詎容於告歸陟祕殿之大名踵珍臺之優禮肆加體貌式聳觀瞻噫壽考維祺朕敢失日秩月存之禮憂心如醉爾無忘晨興夙寤之規益茂養恬對揚猷訓可

何處久太府卿兼知嘉興府制

勅具官某士君子任於時入儀九列出殿三輔通願矣

矧建惟月之禮馮扶風之軼而為王人爾守故家之學
術孰昭代之典章色莊辭毅爭是非於殿陛間不少詘
用之郡國何姦萌之不戢戾氣之不彌哉因南徐惜其
去之早知攜李恐其來之暮就乘夏縵趣布藩條徒得
君重毋薄淮陽也可

度正轉朝議大夫守禮部侍郎致仕制

勅允矣君子佩筆橐以方貞賢哉大夫掛衣冠而何亟
能知所止盍責其行具官某學守粹傳性全至善見於

治郡有閉閣思過之風推以立朝得自牖納約之體進
貳秩宗之典仍參師氏之司尚賴繩愆遽聞告老一正
君而定未究責難之恭致為臣而歸廼慕保身之哲宜
升華秩用慰耆齡還家我雪之邊遺世烟霞之表莫回
爾志徒愴予懷可

太學博士李渠除諸王宮大小學教授制

勅具官某太學在西郊小學在國中四代之制然也二
學並設以教神明之胄則我朝作古爾行應周旋之規

學茂講習之澤相觀而善六館得師而吾葛藟瓜瓞之
秀不可無良範也故輟之司教于宮庠小以成小大以
成大等就傳肄簡而上皆知勉於為善則振振之化行

可



平齋集卷二十一

欽定四庫全書

集部

平齋集卷三十二至

四

詳校官庶吉士臣瑚圖禮

主事臣呂雲棟覆勘

覆校官博士臣劉光第

校對官中書臣范來宗

謄錄監生臣徐瑄

謄錄監生臣龔果

欽定四庫全書

平齋集卷二十二

宋 洪咨夔 撰

外制

禮部侍郎致仕度正贈通議大夫制

勅有十夫子翼方來下於井參不一老慙遺乃去騎於
箕尾宜加祕典庸示瞻懷具官某秉心醇明制行平實
大夫國人之譽蚤推其賢諸老先生之傳晚試所學踐
禁途而獻替遙經幄以開陳每望其儀嘗期以壽胡夕

陽之莫駐忽朝露之先零卧病於數千卷之間性焉已
盡殮含於二三子之手命也何言淒涼萬里之歸赫奕
四階之贈英魂如在茂渥歆承可

趙琳除大理寺丞諸葛十朋除大理司直

勅具官某等獄重事也鍛鍊以為巧擗撫以為察析律
以為密深文以為公而民命近止國脉斷矣理官其可
不選爾琳器含渾樸薰然忠厚長者之風挈繩直於圜
棘刑不失仁故就進之丞爾十朋步中規矩藹然悃悞

無華之美贊芳畫於國帑利不失義故俾繼琳司邦之
直皆以達吾好生之德也敬之哉惟良折獄可

太學正何處恬除太學博士制

勅具官某博士掌通古今漢始以五經制施讎之易孔
霸之書張生之詩小戴之禮皆嘗以是論同異於石渠
其通經何如哉爾涵渾厚之氣蘊精深之學正於膠庠
士服習其訓而不敢犯升之分經講授之官剖疑析滯
導正釋回以成首善之風乃見師法可

架閣林宋偉除太學正臨安府學教授林伯順

除武學諭鄭斗祥除太學錄制

勅具官某等文武異庠而樞紐風化埽冶人物之功等
故選授皆明師爾宋偉志氣激昂講議精博爾伯順風
規凝整汲古深長爾斗祥抱負瑰傑造理宏奧掌故郡
博士中一舉而得三士上庠以宋偉為正斗祥為錄右
庠以伯順為諭望實孚矣教學相長尚觀所進可

兩浙轉運判官顏頤仲除戶部郎官兼知臨安

府制

勅具官某朕聞者親札十有二條教畿尹以重四方之
本丁寧懇到奉行惟人爾立心直而平見理靜而明處
事果而精將漕闕下聲米奮厲撫虎兇之出柙知牛羊
之求牧兼組彈壓都人士安之茲用擢之版部郎俾為
真周以奠枕于京為盛漢以桴鼓不鳴為能變友疆弗
友剛柔異施而國勢增鼎呂之重斯克訓於朕志可

都官兼檢詳趙與憲除直寶章閣兩浙路轉運

判官制

勅具官某歲九遷而日三接遇合之盛也未半歲褒表者五六其非常之遇與爾良而材寬夷而精密治郡輔有善最朕既增秩原其任未幾以丞大宗召又未幾以都官樞掾進又未幾以寶奎寓直國畿將漕選翼乎鴻鵠之遇順風誰能禦之夫諸路之漕一也而漕於畿為難噓弱揉彊壓浮鎮薄與牧尹參錯為功皇皇枕奠矣可

端明殿學士廣東經略知廣州崔與之除參知
政事加食邑四百戶制

朕仰稽列聖並建輔臣在乾德則除餘慶於荆南就參
國秉在紹興則擢趙鼎于江右入預政機肆嘉牧御之
賢久鬱訃謨之望討論舊典揚厲新綸具官某存心以
事天行義以達道風節高乎一世威名聳乎四夷泛三
峽而歸久適山林之樂越五嶺而召尚安水石之閑甫
陞書殿以賦祠旋即里門而宅牧期釋宵衣之慮忘居

畫錦之榮方飛鴉懷我好音已肅登陴之諭迨急鹿鉉
而走險竟伸負固之誅環扶胥黃木以懷生極交阯蒼
梧而息警益深簡在可後儀圖維漢化之雖更尚唐綱
之未振聚民獻以為救寧之本每拊髀於才難開皇極
以示會歸之方尤撫膺於道遠疇可裨於大政信無易
於老成以叶羣心以熙庶務仍總提於邦典兼申衍於
邑租趣裝而來虛寧以待噫召公成南國之化既茂著
於民庸尚父起東海之濱蓋共扶於國勢體予至意究

爾嘉猷可

凌嵩除大理評事制

勅具官某天下之平一傾則用法者皆為之輕重故廷尉置評以平之爾秉心近厚蒞事詳敏退然不知而不愠擢畫一之科亭四方之讞以身體之以心求之何往不得其平哉毋徒曰三尺法安出可

江西路轉運副使吳潛除太常少卿制

勅具官某禮樂根於心著於日用達於天地之化百物

之產隆古聖人重之故分命夷夔以治其精後世文勝
質衰一奉常掌其粗足矣矧卿不常命惟貳之置爾以
倫魁之望發名父之傳事親從兄仁義充於一性而禮
以節之樂以樂之無非實理出揚濡轡之光華入總容
臺之制作孰非實用哉世教之防範不立人心之情偽
益滋借耜取帚拔劍擊柱綱常幾少墮矣爾其思辨上
下和神人之道以暢所學可

馮田改差知金州兼管內安撫制

勅具官某襄沔上流為安康以守行帥事左符每艱其
選爾守洋川有治行制閩謂才周應變績著壽邊宜易
鎮要藩信如其言吾得良牧矣郡據秦楚蜀之會距商
虢孔邇非識常山蛇勢不足以圖攻守而撫軍宇民其
本也毋怠毋易可

資政殿學士中大夫提舉萬壽觀兼侍讀真德
秀轉太中大夫守資政殿學士致仕

勅上印祈閑風獨高於東府掛冠告老景遽迫於西山

繫一身何有於去留而四海實關於輕重特隆禮貌昭
示矐懷具官某俊偉而光明直大而博厚出則野老望
車而迎拜識恨不先入則都人遮道以聚觀用嗟何晚
進陟詞坡之長密陪經廈之游勉朕躬為天地而立心
使斯世見帝王之為道久韞經綸之妙徑躋丞辟之崇
方觀厥成乃辭以疾雖堅留於勸講莫力遏於懷歸何
但上下牀信人才之有間如失左右手况時事之多艱
維聖賢之會難逢而治忽之機易判所期三事寧計一

階噫君子不可諛兮尚想英規之在賢者樂與共也竟
嗟初志之違往服恩徽用光祖道可

資政殿學士致仕真德秀贈銀青光祿大夫制
勅致為臣而歸甫惜孟軻之去非夫人之慟忽驚顏子
之亡以十年退養廊廟之資不一日與聞朝廷之議悲
深易箚恩重書棺具官某休休焉有容屬屬乎其敬中
庸大學之經世講貫深微伊訓說命之格君敷陳坦白
少回翔於禁路首典領於文闈為國蒐賢忘身竭瘁方

騰徹棘之譽已告負薪之憂趣升股肱旋乞骸骨鍾全
氣於三光五嶽如斯幾人受正命於太極兩儀僅爾中
壽舉朝歎息行道咨嗟顧民生之方殿屎豈天意之未
平治咸缺金甌之望特陞銀艾之榮噫涉大水而無津
孰濟奔流之勢仰高山而景行尚聞屹立之風九原可
興百世不朽可

同簽書樞密院事陳卓贈三代

故曾祖嘉謨朝奉郎贈太子少保特贈太子太

保制

勅有媯遠系為漢世家咸而欽欽而躬躬而寵則位司
空實而紀紀而羣羣而恭則官僕射繫流光之無斁蓋
鍾慶之有源具官某故曾祖某充實中存浚明外著愛
利物博古通今孫奉法從之華子拔列卿之穎傳至爾
曾進輔予治培深而發必茂積厚而報亦豐雨露九霄
進陟青宮之保雲來百世益增黃壤之光可

曾祖母黃氏上饒郡夫人贈文安郡夫人

勅天降時雨山川出雲嵩高峻極之詩所以作也必有
隕止發祥之懿是鍾經文緯武之英具官某曾祖母某
氏淑行椒蘭柔儀蘋藻婦從夫而積累始大厥家孫生
子以顯揚遂彊吾國丕顯曾門之慶申加名郡之封俊
然如存歆此休渥可

故祖膏朝奉大夫太府少卿贈太子少傅特贈

太傅制

勅寤寐治功登崇人傑三階聯耀不忘夙夜宥密之忠

五廟均休益茂春秋烝嘗之孝宜隆尊祖用顯詒孫具
官某故祖某德履純明風猷簡遠荐更外服陰成勿翦
之常特立中朝氣凜後凋之栢僅升華於卿月竟鍾瑞
於樞星贊我遠圖皆而遺訓班高亞傳特申加第之恩
望重世臣益篤傳家之慶可

故祖母蔡氏魏郡夫人特贈安國夫人制

勅舜帝之後為陳文王之昭有蔡宜其家室貽厥子孫
具官某祖母某氏任只秉心溫其積行禮嚴舉案曳藻

綬於名卿教篤斷機飛翠綬於法從傳芳再世制勝五
兵不忘報本之思宜厚追榮之典積恩徽於大郡新湯
沐於名邦象服是宜尚其不昧

故祖母汪氏魯郡夫人特贈崇國夫人

勅舍飴弄孫者家庭之慶為醴烝祖者寢廟之榮肆倚
重於良臣庸追榮于大母具官某祖母某氏淑均姆訓
雍肅婦儀采南澗之瀆躬承家而共祀有北山之李世
為國以生賢睦時樞紐之尊贊我經綸之妙孝思惟永

德報宜隆易郡號於曲阜之墟進國封於崇墉之壤潛
光煥發懿魄祇歆

故父居仁華文閣學士正奉大夫贈太師特追

封申國公制

勅朕講求采薇治外之畧企慕烝民任賢之風擢時英
猷列我該輔千尋之木以培植而茂九層之臺以積累
而高必有教忠乃能移孝具官某故父某心夷而履粹
學博而文雄締眷阜陵佩荷囊之清切受知光廟擁茸

燾之森嚴視萬石以為輕傳一經而獨重克開哲嗣進
翊洪樞禰廟䟽榮躋上公於二呂師垣流慶邁盛事於
三陳可

故嫡母王氏鎮國夫人特贈燕國夫人

勅延范葵而開陶侃濟世之功闕玄齡而卜王珪佐時
之業家或無於賢母國奚有於名臣具官某嫡母某氏
環珮雍和悅紛肅穆獻納論思之最能勉其夫彌縫輔
贊之功克昌厥子任方隆於政路報宜侈於脂田進召

公故國之封正魯人小君之號音容未泯嚮盼其歆

故生母俞氏新安夫人特贈和政郡夫人

勅綵衣之戲天性真樂板輿之奉人生至榮瞻予兩社
為輔之英抱此萬鍾致養之憾匪隆祴典曷慰孝思具
官某生母某氏毓詩禮之門嬪衣冠之族怡聲下氣奉
棘列之尊章柔色令儀佐橐班之君子爰篤生於國棟
肆坐筦於天樞心如母存義以子貴易舊封於古歛加
新命於西岷不惟紓蓼莪之悲抑亦示白華之勸

故妻林氏信安郡夫人贈大寧郡夫人

勅召南鵲巢之什夫人起家魯侯燕喜之詩令妻受祉
何嗟契濶不逮顯融具官某妻某氏佩服女貞踐修婦
則于沼于沚齊明錡釜之供如山如河嫺雅笄珈之飾
宜百年之偕老胡一旦之溘先顧予樞臣失此內助宜
郡封之加峻俾廟食之增華

家抑除將作監丞制

勅具官某參井之光下濟岷峨之氣上直鍾其英者多

清廟之器故選拔為盛爾淵於學而晬葩於詞而峻西
產之彥也外閭荐以名薦深鑄弗售特招乃來球璧宜
在東序而涉匠監之筆朕豈以閎劍善最為可略哉職
優事簡姑涵雅望伯仲壘荒聲問孰禦可

四川制置司機宜文字趙珣夫除太社令制

勅具官某朕重名器甚錄其父之勞而進其子於周行
不一二見也爾父以名法從當方面撫蜀控秦具有威
畧贊籌莫府爾抑有助朕何愛司社不以為循陔之榮

哉其砥礪事使人知西平有子可

史彌鞏王禹推務羨賞各轉一官

勅具官某等筦推國計所關羨必有賞爾宅職京口克懋
厥官歲入有常能溢其額俾進陞于一列庸獎厲於勞
能

史全之監軍平蔡州轉兩官制

勅具官某方城負固我師進討摩壘鏖戰遂復故境爾
監厥軍計功受賞兩秩升華勉思來効可

孫林張旺告發軍姦並補承信郎制

勅羽林失馭敢犯紀律爾發其姦悉正顯戮而京邑以
寧登名武階儲材將列表示戎行使知懲勸

陳文孫知高州制

勅具官某炎嶠守吏必諳風土稔習俗然後能盡心於
撫字爾端飭而敏於政守封川民無歎愁易符高涼必
能推之共理詩不云乎誰能烹魚溉之釜鬻貴不擾也
往毋鄙遠其民可

淮東路兵馬提轄耶律均復山陽有功轉三官

授武德大夫兼知淮安州鹽城縣制

勅具官某山陽淮之門戶間為寇保王師大討蟻潰鼠
逸爾塞旗鏖擊之勇莫府高之疊進武階徃理邊邑加
意拊循毋失軍民之譽可

平齋集卷二十二

欽定四庫全書

平齋集卷二十三

宋 洪咨夔 撰

青詞

萬壽觀純福殿開啟甲子本命道場青詞

玉歷紹休猥次周星之歲金行紀閏適臨元命之辰祇
被瑤壇具宣瓊籙伏願真遊潛格景貺旁流九扈有秋
陶人心於和樂三邊無警鞏國勢於奠安

朱表

孟秋月閏先甲命元肅延真馭之臨仰控忱衷之禱上
銷咎證下鎮危情格丕乂於萬方儲鴻休於百世

太一宮祈晴醮青詞

西成應允南畝占豐熏心淫雨之憂拜首叢霄之禱伏
願颺旂潛格曦馭昭升凡陶玉燭之和俱燕金穰之慶
永祐陵下宮顯恭皇后殿神帳後壁山墻坍塌

修整畢告遷神御還殿表文

奠幄栢宮靈旂夙御繕垣椒寢僊仗嘗移屹鳩儻之告

功儼燕寧之復次

孟冬朝獻祝香文

伏願乾文循軌泰道迂衡愛日薰和民遂熙恬之樂朔
方絕警軍無暴露之憂

昭德崇勳閣安奉太師趙汝愚貌像祝文

維姬有旦維宋有公斷鰲奠極賓日升穹歲閱周星祀
登崇功誼禮曲臺妥靈肖容肩摩前哲凌烟媿隆

祭告功臣二十三人祝文

容臺丹青森拱星弁有虛其席惟人是踐相我前寧磐
宗碩彥訊良告虔俎豆羣獻

甲子本命青詞

氣轉一陽甫應初躔之紀辰開六甲首逢瑞命之元祇
演雲籟仰延颺駕伏願天光下濟帝况博臨壽域四方
永底寧民之意金城萬里亟收却敵之功

滿散朱表

序屆初陽辰臨元命宣演沖科之祕導迎善氣之新鶴

喉風聲奉天威而制勝星暉日麗受帝祉以繇休

立春祭太一祝文

天尊神兮挾東皇龍駕翱兮周八荒五福舍兮迪時康
祠壇紫兮歌青陽神宴娛兮夜未央星留俞兮集祥光
四氣和兮萬有昌三垂晏兮九農穰多受祉兮命溥將

太一宮交年醮青詞

化宮密轉序首正於孟陬歲事更新法肇頒於象魏輒
輸悃素仰叩旻蒼靖念眇躬適逢多故隴西未靖逞貌

虎以憑陵漢上方麇又風鶴之報警狼烽交於梁沔騎
塼徧於荆襄由秉德之不康寧致御事之日艱大跂叢
霄而引咎迎端朔以祈休伏願上帝畀矜尊神篤祐以
全取勝亟清玉塞之塵轉危為安增壯金城之勢凡遂
耕桑之樂悉歸覆育之仁

天基聖節青詞

保佑自天運應一元之泰誕彌厥月氣陶萬彙之春展
窠瑤壇投忱璇極伏願兩儀申祐列曜延光時和歲豐

妙叶玉衡之正兵寢刑措屹隆磐石之安

朱表

星回冀厯茂迎震夙之期雲護芝函備展泰元之薦仰
祈昭鑒申錫鴻釐東作西成躋民生於仁壽南暢北洽
措國勢於安疆

孟春朝獻祝香文

伏願緝熙純嘏保合太和雨霽秧疇咸樂東郊之業風
恬柳塞盡清南牧之塵

攢宮補種祝文

路寢孔碩每切慕思春露既濡宜加繕植先事以告維
靈之安

孟夏朝獻祝香文

伏願本支蕃衍疆場救寧物被生成穆若薰風之阜民
陶耕鑿熙然化日之舒

雨師雷師風師祝文

天步方艱以稔為命龍見而雩雨不時若高原下隰曠

其乾矣熬熬然卷簾笠倚耒耜以告瘡神所閔也雷霆以鼓之風雨以潤之坎震巽三者之氣合而陰陽和甘露應既霑既足迄用康年維爾神之功

昭慈聖憲皇后永思陵憲節皇后憲聖慈烈皇
后下宮修葺奏遷神御表文

葱葱鬱鬱蟠佳氣於兩儀實實枚枚鞏闕宮于千古飭御史以省視戒工師而繕修遷御有嚴前期敢告

孟秋朝獻祝香文

伏願氣調玉燭序秩金行雨足周原年屢登於大有風
清漢塞運丕濟於中興

天基聖節錫宴致語

帝出乎震祥開華渚之光雲上于天恩錫鎬京之燕恭
惟皇帝陛下聰明時乂剛健日新與物為春播太和于
有截自天申命綿景祚於無疆臣等幸備伶官願陳口
號

寶鳳啣春度玉墀開基節後即天基日行黃道三辰秩

斗轉蒼龍萬象熙
扶起車攻常武運
做成既醉太平時
千官拜舞東風裏
歡上延英萬歲卮

勾合曲

嵩岳三呼山鞏聖人之壽
鈞天九奏春融治世之音
上天奉天顏教坊合曲

帖子

端平二年端午帖子

皇帝閣五言三首

更化開皇極中興兆赤符節標千歲歷氣協五時圖

又

雨足秧分剛風清麥弄岐聖心涵水鏡即是太平基

又

明進離方午柔生遇已陰妙參三聖易理測兩儀心

七言三首

緝熙虛敞薰颺細清燕深明晝晷長大學中庸繙詠久
金猊幾度手添香

又

登進英才追慶曆開延正論踵咸平朝廷有道長如此
拜賜宮衣信是榮

又

王師一舉下河東好定規摹繼伐功入眼宮槐宜夏日
轉頭關柳易秋風

貴妃閣五言二首

珮襲芳蘭碧釵明寶篆紅深宮三十六同被二南風

又

萱長宜男草榴開結子花
歡聲喧令節慶事屬天家

七言三首

綺疏浸影槐龍轉繡戶浮香艾
虎垂硯冷玉蟬金井水
手抄警戒愛君詩

又

裁成寶月翻宮扇織就祥雲製御衣
朝賀歸來無點暑
坐看燕子引雛飛

又

穿蓮漏水金鋪邃雪藕衣輕玉殿涼好把毋邪毋不敬
細挑綵字壽君王

端平三年春帖子詞

皇帝閣五言三首

歛鳳東風轉携龍北斗回人間道振鐸天上獸樽開

又

冰天寒雪餞暘谷霽華賓生意乾坤滿宸襟一點春

又

寬大朝廷詔中和郡國詩欲求躋慶歷先使見淳熙

七言三首

喚仗紫宸披曉靄退朝清宴坐晴霏簡編有味鑪香永
鈴索無聲漏箭稀

又

東風送喜上天顏吉語飛來井軫間榆塞雪消鳴鏑靜
柳營月暖擊刁閑

又

麥苗培秀臘前雪
稻種浸芽春後晴
野老田夫觀治象
便從新歲賀昇平

皇后閣五言二首

太液輕澌溫明霽
日融菜流芳荇碧
花頌瑞椒紅

又

甲觀韶光集禊壇
好語傳思齊男慶
百假樂子宜干

七言三首

塗山陰贊夏王化媯汭密媿虞帝仁保合太和無間斷
際天蟠地一般春

又

關雎風化冠周南次第桃夭及葛覃農事未興先獻種
女紅方起又親蠶

又

殷雷金鑰千門邃斜月璇題六寢深禁柳護寒烟未起
求衣已獻晚朝箴

貴妃閣五言二首

梅試催妝粉蘭披入夢香迎春占北斗受福拜東皇

又

象應軒龍次恩承帝座光燕壇風澹蕩蠶館日舒長

七言三首

春透蓬萊碧玉壺晴窓恭侍寶奎敷從容玩畫家人卦

取次題箴列女圖

又

鳩鵲雪殘籠霽景
鷓鴣波暖颺紋漪
宮中不用催行樂
草木羣生各自熙

又

萬年枝上綵綴綠
千葉花頭酥點紅
鏡綬囊絲相映燭
探先半月慶流虹

古今詩

東山

金堂石室舊徜徉
被髮依然下大荒
風送嬋娟花落葉

雲移縹緲濕踈篁
桓伊箏外深情酒
幼度碁邊定力香
萬事古今開闔眼
樓頭吹面水風涼

東山即事

西風卷宿裊天高
近重陽門虛自沆瀣
塔靜能琅璫幽
花多素英穠香奪
春芳草木未黃落
繁陰留夏涼棋雋
決漢楚杯壯迷彭
殤醉帽信孟嘉歸
鞭忘葛彊萬事貴
適意誰能扣蒼蒼

東山塔院春暮

太皞明朝禪祝融杖藜能送幾東風
兩崖蘿蔓因依綠一樹桐花自在紅
聒聒竊脂農即事啣啣搏黍女趨功
細思舉世誰閑得一咲浮圖倒影中

又絕句

折屐綦邊情易矯捋鬚笋畔淚難禁
何如拍手招元放玉室金堂深更深

三休亭

亭在玲瓏山九折岩之南

出郭暄欲暑涉林清自秋步隨目力高
身與山氣浮飛

來辛夷花拾得蓮葉舟一聲提壺盧四顧叢薄幽詰屈
九曲屏突兀十二樓泉流澗級峻雲起樹陰稠左摩紫
髯兕右拂蒼鱗虬上呼笙簫侶下瞰錦繡洲太極浩初
判此山鬱相繆幾人記曾來老苔蝕雕鏤玲瓏聽我歌
歌徹玲瓏愁有酒且滑我羲娥雪人頭

丁東泉

渴烏滴盡三更雨鐵鳳敲寒六月風湯餅困來茶未熟
為師搖夢作丁東

招隱辭

雲氣斂兮天目之巔
濤江綫橫兮海門濺濺
扶桑子半兮陽鳥翩翩
可俯而掬兮咽以天井
無聲之泉子其隱乎
吾與子兮拾荃

其二

雲氣冒兮天目之趾
疊湫瀆薄兮洞石齒齒
列缺正晝兮睡蛟蟄起
可恭而擾兮浴以天河
倒流之水子其隱乎
吾與子兮採芷

其三

雲氣吐今天目之腹乳潭沉沉兮鴨潭煜煜徐伍朝往
而暮來兮雙碧鹿可挽而舞兮侑以天風步虛之曲子
其隱乎吾與子兮蒔菊

徐伍天目二仙人

寶福寺山房

門巷蕭然雀可羅藏書萬卷自研摩懶尋玉女登西嶽
甘伴金仙坐補陀書帶草長塵慮少鉢曇花放道緣多
酒肴問字如相過引道松間不用呵

又荅景陽

朝家久設禮為羅小寄禪窓共講摩紅錦障泥飛驃裏
黃金寶校設盤陀冰蘂薦飯鄉風古雪汁烹茶雅道多
領取單傳心法去會將佛祖一時呵

再用韻

烟霏深處萬山羅閑裏工夫歲月磨上採締書乾鑿度
下搜史志薛延陀手授不厭薰沈少心賞何妨闕多

若問闕

閣闕

南豐一辯也須呵

遊峯寧山

驟暖偃芳草薄遊烘軟塵亂山雲氣曉啼鳥杏林春人
物少催老浮華陳玩新一聲鏗爾瑟澗水綠粼粼

西山

晉許邁隱居處

西山許邁無人問只說東山有謝安富貴光明貧賤晦
世情從古兩般看

九州山僧房

路突亭依石林均渚見沙欽危幾岫樓深蔚似瑯琊客

動驚寒思僧閑忘歲華
雨窓風露影一樹枇杷花

題松軒

蒼官面目冷於冰
傾蓋真成耐久朋
隨世炎涼渠自爾
與時榮悴我何曾
聲傳茶鼎風鳴籟
影過熏爐月抹楞
束傳欲煩三昧手
箇中着個覓詩僧

翠蛾亭

晴雷碾破白雲窩
無數林花滾下坡
好把轆轤翻轉着
崑崙頂上捲黃河

次俞紫薇止止堂詩

佛法示無法人謀盡過謀說空猶是著領妙更何求徑
滑松杉古窻虛水石幽琤琤鳴鐵裏安處一時休

東山塔院

僧伽傳法處阿育放光時到頂上無縫透心橫有枝梅
間詩鳳味竹裏酒鷓夷醉上危層去空明渺所思

平齋集卷二十三

欽定四庫全書

平齋集卷二十四

宋 洪咨夔 撰

啟一

謁莊提舉啟

鐵硯關心莫續盤洲之脉繡衣具眼好開泮水之荒雖
離竒了無先事之容而啐啄或有同時之理不孤此志
端繫其逢昔者東坡之門卓然北斗之望惟斯文之宗
主在是故當世之豪傑歸之后山仕徐嘗賦稻苗待公

秧之向山谷游魏亦哦小草有遠志之詩皆繇郡文學
之官自附墨客卿之列品題一出聲價倍增四學士之
名等華嶽而俱重六君子之號與日星而並垂此風無
傳吾道誰屬必宗工之繼作則善類之爭趨伏念某骨
相蹒跚性資骯髒悲歌長缺盾鼻之檄未能活計短檠
床頭之易猶在諷重闈之白髮峭獨冷之青衫訪三洪
於故國之中拜一范於公堂之上湖山醒夢何嫌書懶
讀之嘲山色療饑敢為飯不足之嘆顧此游之不惡知

其命之將通恭惟某官吾儒津梁斯世鼎呂辟雍講道
激揚洙泗之波祕府抽書排憂蓬萊之氣胡斜飛而背
日肯夙駕以觀風以胸中之鏡而照老吏之百姦以肘
後之方而起疲眊之九死且力扶於公議每樂得於英
髦有觀賞音遂忘躍冶僖公六轡九頓首於先驅惠子
五車一點頭於後覺歸依良切敷染奚殫

謝葉提刑薦啟

泮水思樂熟觀魯侯之旂雩舞詠歸首與曾點之瑟孰

蚍蜉之借援自螺贏之投機引而進之望不及此竊以古靈之藁莫非名臣温公之門類多君子惟相知不在肝鬲之表故一見盡得眉睫之間信公道之主盟乃人材之司命如某者拊缶不韻挈筭無竒遇會意之文時擬景福靈光之賦求安心之法日對布衾陋室之銘羞襤褸以不為任抑揄而弗顧正請老農之學忽求病甍之師抵掌而談古今千歲可坐致也屈指而計日月期年尚竊遲之豈期夜雨之燈忽入春風之筆先鞭方著歸

袞難留盍埃風而上征殿奔雖後過屠門而大嚼知味
已多倘自茲或尋覆蕉之緣則其他可乘破竹之勢造
物所相終身焉依茲蓋伏遇某官列戟名家褰帷膚使
抱王霸之略前身江左之夷吾主人物之評後世汝南
之許劭障未流於既倒牖晚學於方來淑氣一噓韶華
四滿猶謂踈枝冷葉有未放之寒梅縱令換葉移根亦
舊栽之紅藥軒昂露剡特達知音某敢不恪守官箴勉
求師說四方逐東野自今有入道之門一辦為南豐何

日是報恩之地

謝費提刑薦啟

光近繡衣久跂八鸞之末褒榮華袞忽開三鱣之先一
舉軒然斯文幸甚某嘗觀種樹之傳因得論花之評香
出污泥濂溪之愛蓮未為過影橫籬落和靖之好梅正
自佳其或合小樊水僊而為弟兄以至集海棠醪釀而
與賓客雖非同調還許睽芳如某者狷有弗為懦知自
立收心學問不過乘欸段而稱善人抗志功名未免帶

櫺具而見公子來習青青之佩得依皇皇之華曲為吾
道之主盟不以衆人而見遇念瀕於滿盍寵其歸飛一
鶚於霄漢之邊送乘鴈於江湖之上俾之末綴假以先
容茲蓋伏遇某官功過于張材如房杜轉移風俗力可
以回萬牛主張人材言足以重九鼎滋蘭荃而方茂擷
芹茹以尤勤遂令孤竒之微亦殿羣英之後某敢不篤
於信道期以酬恩誦醉時歌寧歎廣文之冷作進學解
尚觀宰相之方過此以還未知所措

謝鞏都大薦啟

虎鼠不齊幾多屬吏熊魚兼得獨一門生異哉知己之
深榮矣終身之託嘗觀古人推賢之道因得君子引類
之心仁傑之舉東之屢稱為宰相之器蕭何之薦韓信
數謂有大將之材言不厭多用然後已每嘆此風之寢
遠不圖今日之猶存如某者直是孤寒甘從獨冷過辱
諸公之遇特開寸進之途著從事之衫固知有分給尚
書之札猶嘆無因忽聞一鷲之飛復許六鰲之掣俾得

與政事文學之秀者早及英華精銳而用之茲蓋伏遇
某官範世清規鑄人妙學以修明公道自任如日行天
以涵育人材為心如川赴海最憐水底之芹藻屢采水
邊之芷荃始終三年矜睠一意某敢不力守狂狷之行
多讀聖賢之書陳古靈䟽名以聞未知所報趙韓王綴
奏而進更大其成國士自期墨卿莫究

回鄱陽張宰啟

閱千佛之經升沉有異作同官之記先後無多分桃李

之餘陰動茆芥之生意恭惟某官氣摩霄漢手摘星辰
過秦論以來復見作者諭蜀檄而下蓋優為之蜚聲翰
墨之場抗志功名之會凜凜胸中之兵甲堂堂眼底之
金湯八面當鋒一身是胆張睢陽之罵賊誰解秋圍劉
并州之卻胡竟成宵遁勲當居最賞未酬勞收鶴唳之
餘聲躡飛鳧之雋武未施於事已信其能三異政成沛
弦歌於東楚十行詔下鏘環珮於西崑某一第八年重
親寸祿睨健翮於扶搖之上抱寒根於寂寞之濱忽得

年盟好為道地有酒沽我不須問識事之奇退食自公
政可說從軍之樂

通交代林教授啟

才名方冊之間願從而後交好珮衿之地偶在其前糠
粃色羞藻芹增氣恭惟某官學傳伊洛文過晁張橫絕
銀河織天孫之雲錦倒翻滄海弄明月之驪珠妙舍選
之青錢高臚傳之淡墨欲培所養靡疾其驅乃瞻楚東
庠序之林實為江左衣冠之藪一闕隔市俗客不來雙

塔照湖偉人間出宜得胡安定之宿望以修范文正之
遺規螺觜地清聊對簷花之雨螭頭天近即迎御柳之
香某喜共儒門愧妨賢路徑腹之嘲未解刀頭之夢頻
驚遺君子以桃李之場迹將去此納諸生於芝蘭之室
尚亟圖之

生日回學職啟

乾策年華方驚去速土圭日景又欲添長雖無蛻鶴之
姿僅有聞鷄之志辱高懷之期許迂雋步以臨存出幼

婦受辛之辭推老人甲子之數絳紗幃底欠度曲之雪
兒青玉案邊付誦詩之驪子其為感佩未易名言

謝黃留守科目啟

分教三年受察詩書之帥去官數月登名文學之科貌
無地以先容恍自天而下墜得公借重舉世知榮竊以
古人以文表見者蓋多後世隨手漸滅者皆是作毛穎
傳猶謂類俳續春秋經或譏失僭要得宗工之印可始
成後進之聲名伏念某嗜古忘餐愛竒成癖有歐陽必

同歐陽之說期之千百年之餘非子雲莫好子雲之書
豈以一二人而輟未離翰墨之徑遂墮齏鹽之場患在
為師教因知困謝江郊之陳跡臨京國之迷津吾黨雖
狂誰門可叩遽辱收千金之敝帚奚啻獲一壺於中流
機會之來神明所相茲蓋恭遇某官日光玉潔山立時
行著書立言襲六為七而無媿解疑辨惑問一得三而
有餘發先儒之所未傳使後覺之有定鄉頃東游而納
謁因北面以知歸見若平生期諸宴歲不謂久違於矩

範乃蒙肯記其姓名雖無子固之文亦應溫公之格某
敢不益彊所學期放厥辭日近長安喜聽袞歸之詔雲
趨材館終歸釣播之功

宗教謝廟堂啟

糞鹽有分未寒侯類之盟橐籥無私仍玷宗庠之選寸
進當安於常分一命皆出於至恩拊已包羞逢時知幸
竊以東平為善之最樂河間大雅之不羣由其得涵養
學問之源所以忘生長富貴之習欲陶成於公族必監

擇於師儒如某者久坐文窮難醫書癡頭顱如許敢謂
緝緝有封侯之方面目可憎自知管城非食肉之相末
第坐踰於一紀冷官僅了於三年畫餅可觀炊沙不飽
靖念皇極無棄人之法況當太平樂與賢之秋歸誠光
範之門妄意翹材之館惟愛人之以德故應物之無心
謂其嘗在文學之科可使徃分屬籍之教資格雖慚於
黃甲姓名猶託於青氈磨鐵硯以為期徒抱益堅之志
垂玉衡而在上莫名平施之功茲蓋恭遇某官德享天

心功在王室網維萬化國有闕睢麟趾之風羽翼羣經
人由中庸大學之道力任斯文之重妙裁吾黨之狂權
度無差斗筭不棄其敢不篤於潔已思以淑人遲瓜戍
於八年之餘疇能縮地速化工於一息之頃尚覲迴天
捧戴惟深稊摩罔既

謝莊中書舉自代啟

禁路問津首玷十科之選詞垣正席仍推三字之儲賞
音愈久而愈深推轂不進則不已感由心刻聲與淚俱

竊以東坡免試而薦伯修南豐初除而舉貢父是實是
主無古無今如某者鐵硯僅存金稗何有少未聞道徒
寄榮華於飄風之中晚悟作文頗見涯涘於霜降之後
抑而為說難孤憤放而為牢愁反騷是特不平之鳴殆
非有用之學胡傑出於一佛俾同升於諸公舍旃舍旃
苟亦無然雖讒波之可畏類我類我久則肖矣終恩地
之有歸對黃茅白葦之秋光借紅藥蒼苔之春色聞風
甚偉學步良難茲蓋恭遇某官道德宗師文章宿老紫

薇閣靜一揮贊普之書白玉堂深屢草河涼之詔每謂
絲綸之手要須錦繡之胄豈無他人正在我輩為命得
裨謀子產顧不偉與稽首遜艾折伯與亦幾過矣某敢
不彈冠而起執筆而從醜婦效顰詎作金屋人家之想
癡兒說夢尚追鈞天帝所之游銘德惟勤抒詞莫既

謝廟堂啟

雷霆震疊正切省循日月清明遂叨技拭轉化功其有
力戴恩紀乎無涯竊以剝復相乘者陰陽之機生育不

窮者天地之德。蠖信於屈，沍寒之氣回春，苗稿而興。大旱之雲為雨，凡物皆爾於人亦然。如某者魏瓠中枵晉，雖外鈍生涯，牢落初無躬外之田。學術荒踈，僅餘牀頭之易，或喜其有山林之氣，或疑其非邊幅之材。竟坐五窮難逃，百謫大為世僂。方無地以容身，過重親憂遽終天而抱痛所欠一死不圖更生，緇衣之宜又改為兮。端出中心之好，白圭之玷尚可磨也。大明前事之愆復俾臨民免為棄物，茲蓋恭遇某官身任四海九州之重道。

為五帝三王之師排幹黃河回天下不能回之勢涵溥
滄海受敵已所難受之言趙韓王開國之元勳文潞公
服人之厚德相去幾世合為一人乃若以春秋為繩世
之權以皇極為用人之法平心而運公是以昭脫諸千
仞之淵示以九達之路虎豹啄下人些知莫扼於九
關鸞皇為先戒兮願早施於八翼大造所及終身焉依


謝廟堂差幹官啟

公朝天大甫開荆棘之塗邊閫地雄遽綴芙蓉之幕驚

魂復返感涕交流蓋嘗絕大江而東遊倚長淮而北望
雖有可乘之幾會未知一定之規摹苟於偏安殆非孔
明公瑾之志急於進取未免蔡謨羲之之憂雖堅忍可
與成功而審量最為上策首擊尾應尾擊首應要莫測
於吾謀我出彼歸彼出我歸使常牽於後顧縱未大慰
乎元黃之篚亦可坐弭乎赤白之囊責在元戎亦資緩
畫如某者交無狗監泣有牛衣滄浪濯纓早嘆鬢毛之
颯大行倚劍斗驚髀肉之盈居紛紛其離尤分落落乎

難合化功一轉生意頓回朝刊黜籍之丹暮刻辟函之
墨拔從九地置在重霄巴西此日之放魔可謂仁矣塞
北向來之失馬詎非福耶矧去家無千里之遙而望祿
特半年之近生成至此稱塞謂何恭惟某官以社稷臣
為帝王佐十年生聚十年教訓坐凝更化之勲一歲力
役一歲戍屯深軫佳兵之慮惟奠安中國以為急斯鎮
撫四夷而有餘既素定於廟謨尤不輕於邊鎖大先謀
帥細及簡僚遂令守玄尚白之蹤亦在依紅泛綠之數

某敢不痛心前轍加意後鞭不徒巧升斗以養親庶幾
展尺寸以圖報平定安集况曾讀建武天子之詔書踴
躍懽呼所願草頡利可汗之露布歸依大造誓畢餘生



平齋集卷二十四